

四庫全書

史部

欽定四庫全書

史部

歷代名臣奏議卷三百十八

詳校官編修臣周 瓊

編修臣裴 謙 覆勘

總校官編修臣王 燕 緒

校對官編修臣盧 遂

謄錄監生臣宋 學 濂

欽定四庫全書

歷代名臣奏議卷三百十八

明 楊士奇等 撰

弭盜

宋英宗治平元年知諫院司馬光論除盜劄子曰臣竊聞降勅下京東京西災傷州軍如人戶委是家貧偷盜斛斗因而盜財者與減等斷放未知虛的若果如此深為不便臣聞周禮荒政十有二散利薄征緩刑弛力舍

禁去幾率皆推寬大之恩以利於民獨於盜賊愈更嚴
急所以然者蓋以饑饉之歲盜賊必多殘害良民不可
不除也頃年嘗見州縣官吏有不知治體務為小仁者
或遇凶年有劫盜斛斗者小加寬縱則盜賊公行更相
劫奪鄉村大擾不免廣有收捕重加刑辟或死或流然
後稍定今若朝廷明降勅文預言偷盜斛斗因而盜財
者與減等斷放是勸民為盜也百姓乏食官中當輕徭
薄賦開倉賑貸以救其死不當使之自相劫奪也今歲

府界京東京西水災極多嚴刑峻法以除賊盜猶恐春
冬之交飢民嘯聚不可禁禦又況降勅以勸之臣恐國
家始於寬仁而終於酷暴意在活人而殺人更多也凡
號令之出不可不慎毫釐之失為害實多若纔知其失
隨即更張猶勝於有害及民迷而不復者也伏望陛下
速令收還此勅嚴責京東京西轉運司及州縣應災傷
之處多方擘畫斛斗救濟飢民若有一人敢劫奪人斛
斗者立加擒捕依法施行如此則衆知所畏不敢輕犯

所以保全愚民減省刑獄之道也

二年侍御史趙瞻論京東盜賊疏曰臣伏見羣盜殺害輔郡之官吏繫囚叛起京畿之獄此皆前古禍亂之萌朝廷腹心之慮為最急務而政府唯不過發闕移為督責之狀州郡亦不過備游徼為期會之迹而已文書一報恬為無事但用習常苟求按問未有為國家窮淵數積奸之源塞萬一不測之計也謹按兩漢故事膠東盜賊起宣帝即用張敞為膠東相渤海左右郡盜賊起丞

相御史即舉龔遂為太守潁川盜賊起光武即以寇恂
為太守南山羣盜起大將軍王鳳即薦王尊行京兆尹
事據兩漢時盜賊奏至天子與大將軍丞相御史擢舉
守臣復尚蠲去繁文假以一切而後激勸吏民鎮安風
俗莫不即著成效也平時國家列官校任即一路有安
撫總管鈐轄兵馬一郡有知州丞尉提舉巡檢一縣有
令尉此皆盜賊之司也今一旦不逞之人數十相聚遂
至賊殺官吏顧諸備位誰有受斯責者環視俟變無一

援救其間甚者則必有罪其死戰之忠以爲貪功辱命
然則是無有公家竭力之人矣且昔用一郡守則盜賊
屏息今聯縣數十員而尤不能禁者何哉蓋昔之責以
實效而今之官司取空文也今盜一發符牒四走則曰
吾有文書下一路矣帥府則曰吾有文書下郡矣按具
則吾無責也郡則曰吾有文書下巡邏令尉矣闕白即
吾無責也令尉則曰吾有文書下坊里保伍矣期會則
吾無責也此其由來得非自朝廷之守空文邪使因循

巽愞之吏傳執曹按而與趣公疾惡之人挈度計校是終無以成實效也今知曹州王知賢不能禁盜賊致成徒黨知濮州戚舜元年力衰老素無才術唯此二州為賊所聚臣今欲乞先於曹濮專責知州通判且令條陳方略更明賞罰許其規畫悉就討捕督以近限約以重劾如其逗遛無所建明即下有司責以無狀別委輔臣舉用才吏京東應諸郡悉可依此更張且須成績乃議酬擢處置之宜俾先圖上朝廷更為裁擇官吏自無

苟簡足以肅清內郡震帖遠方臣愚不勝懇激之至

神宗熙寧七年太常博士直史館權知密州軍州事蘇軾論河北京東盜賊奏曰臣伏見河北京東比年以來蝗旱相仍盜賊漸多今又不雨自秋徂冬方數千里麥不入土竊料明年春夏之際寇攘為患甚於今日是以輒陳狂瞽庶補萬一謹按山東自上世以來為腹心根本之地其與中原離合常係社稷安危昔秦并天下首取三晉則其餘強敵相繼滅亡漢高祖殺陳餘走田橫

則項氏不支光武亦自漁陽上谷發突騎席卷以并天下魏武帝破殺袁氏父子收冀州然後四方莫敢敵宋武帝以英雄絕人之資用武歷年而不能并中原者以不得河北也隋文帝以庸夫穿窬之智竊位數年而一海內者以得河北也故杜牧之論以為山東之地王者得之以為王霸者得之以為霸猾賊得之以亂天下自唐天寶以後姦臣僭峙於山東更十一世竭天下之力終不能取以至於亡近世賀德倫挈魏博降後唐而梁

亡周高祖自鄴都入京師而漢亡由此觀之天下存亡之權在河北無疑也陛下即位以來北方之民流移相屬天災謹告亦甚於四方五六年間未有以塞大異者至於京東雖號無事亦當常使其民安逸富強緩急足以灌輸河北餅竭則壘恥膺亡則齒寒而近年以來公私匱乏民不堪命今流離饑饉議者不過欲散賣常平之粟勸誘蓄積之家盜賊縱橫議者不過欲增開告賞之門申嚴緝捕之法皆未見其益也常平之粟累經振

發所存無幾矣而饑寒之民所在皆是人得升合官費
丘山蓄積之家例皆困乏貧者未蒙其利富者先被其
災昔季康子患盜問於孔子孔子對曰苟子之不欲雖
賞之不竊乃知上不盡利則民有以為生苟有以為生
亦何苦而為盜其間凶殘之黨樂禍不悛則須教法以
峻刑誅一以警百今中民以下舉皆闕食冒法而為盜
則死畏法而不盜則飢飢寒之與弃市均是死亡而賒
死之與忍飢禍有遲速相率為盜正理之常雖日殺百

人勢必不止苟其陛下至明至聖至仁至慈較得喪之孰多權禍福之孰重特於財利少有所捐衣食之門一開骨髓之恩皆徧然後信賞必罰以威克恩不以僥倖廢刑不以災傷撓法如此而人心不革盜賊不衰者未之有也

元豐元年十月軾為尚書祠部員外郎直史館權知徐州軍州事上書曰臣以庸材備員冊府出守兩郡皆東方要地私竊以為守法令治文書赴期會不足以報塞

萬一輒伏思念東方之要務陛下之所宜知者得其一
二草具以聞而陛下擇焉臣前任密州建言自古河北
與中原離合常係社稷存亡而京東之地所以灌輸河
北耕竭則壘恥屑亡則齒寒而其民喜為盜賊為患最
甚因為陛下畫所以待盜賊之策及移守徐州覽觀山
川之形勢察其風俗之所上而考之於載籍然後又知
徐州為南北之襟要而京東諸郡安危所寄也昔項羽
入關既燒咸陽而東歸則都彭城夫以羽之雄畧捨咸

陽而取彭城則彭城之險固形便足以得志於諸侯者
可知矣臣觀其地三面被山獨其西平川數百里西走
梁宋使楚人開闕而延敵材官騶發突騎雲縱真若屋
上建瓴水也地宜宿麥一熟而飽數歲其城三面阻水
樓堞之下以汴泗為池獨其南可通車馬而戲馬臺在
焉其高十仞廣袤百步若用武之世屯千人其上聚櫓
木砲石凡戰守之具以與城相表裏而積三年糧於城
中雖用十萬人不易取也其民皆長大膽力絕人喜為

剽掠小不達意則有飛揚跋扈之心非止為盜而已漢高祖沛人也項羽宿遷人也劉裕彭城人也朱全忠碭山人也皆在今徐州數百里間耳其人以此自負凶桀之氣積以成俗魏太祖以三十萬人攻彭城不能下而王智興以卒伍庸材恣睢於徐朝廷亦不能討豈非以其地形便利人卒勇悍故耶州之東北七十餘里即利國監自古為鐵官商賈所聚其民富樂凡三十六冶冶戶皆大家藏鏹巨萬常為盜賊所窺而兵衛寡弱有同

兒戲臣中夜以思即為寒心使劇賊致死者十餘人白書入市則守者皆奔而走耳地既產精鐵而民皆善鍛散冶戶之財以嘯召無賴則烏合之衆數千人之仗可以一夕具也順流南下辰發已至而徐有不守之憂矣使不幸而賊有過人之才如呂布劉備之徒得徐而逞其志則京東之安危未可知也近者河北轉運司奏乞禁止利國監鐵不許入河北朝廷從之昔楚人亡弓不能忘楚孔子猶小之況天下一家東北二冶皆為國興

利而奪彼與此不已隘乎自鐵不北行冶戶皆有失業之憂詣臣而訴者數矣臣欲因此以征冶戶為利國監之捍屏今三十六冶冶各百餘人採鑛伐炭多飢寒亡命強力鷙忍之民也臣欲使冶戶每冶各擇有材力而忠謹者保任十人籍其名於官授以卻刀刀槩教之擊刺每月兩衙集於知監之庭而閱試之藏其刀於官以待大盜不得役使犯者以違制論冶戶為盜所擬久矣民皆知之使冶出十人以自衛民所樂也而官又為除

近日之禁使鐵得北行則冶戶皆悅而聽命姦猾破膽
而不敢謀矣徐城雖險固而樓櫓敝惡又城大而兵少
緩急不可守今戰兵千人耳臣欲乞移南京新招騎射
兩指揮於徐此故徐人也嘗屯於徐營壘材石既具矣
而遷於南京異時轉運使分東西路畏餽餉之勞而移
之西耳今兩路為一其去來無所損益而足以為徐之
重城下數里頗產精石無窮而奉化廂軍見闕數百人
臣願募石工以足之聽不差出使此數百人者常採石

以甃城數年之後舉為金湯之固要使利國監不可窺則徐無事徐無事則京東無虞矣沂州山谷重阻為逋逃淵藪盜賊常入徐州界中陛下若採臣言不以臣為不肖願復三年守徐且得兼領沂州兵甲巡檢公事必有以自効京東惡盜多出逃軍逃軍為盜民則望風畏之何也技精而法重也技精則難敵法重則致死其勢然也自陛下置將官修軍政士皆精銳而不免於逃者臣嘗考其所由蓋自近歲以來部送罪人配軍者皆不

使役人而使禁軍軍士當部送者當牒即行往反常不
下十日道路之費非取息錢不能辦百姓畏法不敢貸
貸亦不可復得惟所部將校乃敢出息錢與之歸而刻
其糧賜以上下相持軍政不修博奕飲酒無所不至窮
苦無聊則逃去為盜臣自至徐即取不係省錢百餘千
別儲之當部送者量遠近裁取以三月刻納不取其息
將吏有貸息錢者痛以法治之然後嚴軍政禁酒博比
暮年士皆飽暖練熟技藝等第為諸郡之冠陛下遣敕

使按閱所具見也臣願下其法諸郡推此行之則軍政
修而逃者衰亦去盜之一端也臣聞之漢相王嘉曰孝
文帝時二千石長吏安官樂職上下相望莫有苟且之
意其後稍稍變易公卿以下轉相促急司隸部刺史發
揚陰私吏或居官數月而退二千石益輕賤吏民慢易
之知其易危小失意則有離畔之心前山陽亡徒蘇令
從橫吏士臨難莫肯伏節死義者以守相威權素奪故
也國家有急取辦於二千石尊重難危乃能使下以王

嘉之言而考之於今郡守之威權可謂素奪矣上有監
司伺其過失下有吏民持其長短未及按問而差替之
命已下矣欲督捕盜賊法外求一錢以使人且不可得
盜賊凶人情重而法輕者守臣輒配流之則使所在法
司覆按其狀劾以失入惴惴如此何以得吏士死力而
破姦人之黨乎由此觀之盜賊所以滋多者以陛下守
臣權太輕故也臣願陛下稍重其權責以大綱濶畧其
小過凡京東多盜之郡自青鄆以降如徐沂齊曹之類

皆慎擇守臣聽法外處置強盜頗賜緡錢使得以布設
耳目蓄養爪牙然緡錢多賜則難常少又不足於用臣
以為每郡可歲別給一二百千使以釀酒凡使人葺捕
盜賊得以酒予之敢以為他用者坐賊論賞格之外歲
得酒數百亦足以使人矣此又治盜之一術也然此皆
其小者其大者非臣之所當言欲默而不發則又私自
念遭值陛下英聖特達如此若有所不盡非忠臣之義
故昧死復言之昔者以詩賦取士今陛下以經術用人

名雖不同然皆以文詞進耳考其所得多吳楚閩蜀之人至於京東西河北河東陝西五路蓋自古豪傑之場其人沈鷲勇悍可任以事然欲使治聲律讀經義以與吳楚閩蜀之士爭得失於毫釐之間則彼有不仕而已故其得人常少夫惟忠孝禮義之士雖不得志不失為君子若德不足而才有餘者困於無門則無所不至矣故臣願陛下特為五路之士別開仕進之門漢法郡縣秀民推擇為吏考行察廉以次遷補或至二千石入為

公卿古者不專以文詞取人故得士為多黃霸起於卒
史薛宣奮於書佐朱邑選於嗇夫丙吉出於獄史其餘
名臣循吏由此而進者不可勝數唐自中葉以後方鎮
皆選列校以掌牙兵是時四方豪傑不能以科舉自達
者皆爭為之往往積功以取旄鉞雖老姦巨盜或出其
中而名卿賢將如高仙芝封常清李光弼來瑱李抱玉
段秀實之流所得亦已多矣王者之用人如江河江河
所趨百川走焉蛟龍生之及其去而之他則魚鼈無所

還其體而鯢鯁為之制今世胥史牙校皆奴僕庸人者無他以陛下不用也今欲用胥史牙校而胥史行文書治刑獄錢穀其勢不可廢鞭撻鞭撻一行則豪傑不出於其間故凡士之刑者不可用用者不可刑故臣願陛下採唐之舊五路監司郡守共選土人以補牙職皆取人材心力有足過人而不能從事於科舉者祿之以今之庸錢而課之鎮稅場務督捕盜賊之類自公罪杖以下聽贖依將校法使長吏得薦其才者第其功閱書其

歲月使得出任比任子而不以流外限其所至朝廷察其尤異者擢用數人則豪傑英偉之士漸出於此塗而姦猾之黨可得而籠取也其條目委曲臣未敢盡言惟陛下留神省察昔晉武平吳之後詔天下罷軍後州郡悉去武備惟山濤論其不可帝見之曰天下名言也而不能用及永寧之後盜賊蜂起郡國皆以無備不能制其言乃驗今臣於無事之時屢以盜賊為言其私憂過計亦已甚矣陛下縱能容之必為議者所笑使天下無

事而臣獲笑可也不然事至而圖之則已晚矣干犯天威罪在不赦

軾代李琮論京東盜賊狀曰臣伏見自來河北京東常苦盜賊而京東尤甚不獨穿窬祛篋椎埋發塚之姦至有飛揚跋扈割據僭擬之志近者李逢徒黨青徐妖賊皆在京東凶愚之民殆已成俗自昔大盜之發必有釁端今朝廷清明四方無虞而此等常有不軌之意者殆土地風氣習俗使然不可不察也漢高祖沛人項羽宿

遷人劉裕彭城人黃巢宛胸人朱全忠礪山人其餘歷
代豪傑出於京東者不可勝數故凶愚之人常以此藉
口而其材力心膽實亦過人加以近年更改貢舉條制
掃除腐爛專取學術其秀民善士既以改業而其朴魯
强悍難化之流抱其無用之書各懷不逞之意朝廷雖
敕有司別立字號以收三路舉人而此等自以世傳朴
學無由復踐場屋老死田里不入彀中私出怨言幸災
伺隙臣每慮及此即為寒心揚雄有言御得其道則天

下狙詐咸作使御失其道則天下狙詐咸作敵而班固亦論劇孟郭解之流皆有絕異之姿而惜其不入於道德苟放縱於末流是知人之善惡本無常性若御得其道則向之姦猾盡是忠良故許子將謂曹操曰子治朝之能臣亂世之姦雄使韓彭不過漢高亦與盜賊何異臣竊嘗為朝廷計以謂窮其黨而去之不如因其材而用之何者其黨不可勝去而其材自有可用昔漢武嘗遣繡衣直指督捕盜賊所至以軍興從事斬二千石以

下可謂急矣而盜賊不為少衰者其黨固不可盡也若朝廷因其材而用之則盜賊自消而豪傑之士可得而使請以唐事明之自天寶以後河北諸鎮相繼僭亂雖憲宗英武亦不能平觀其主帥皆卒伍庸才而能於六七十年間與朝廷相抗者徒以好亂樂禍之人背公死黨之士相與出力而輔之也至穆宗之初劉總入朝而河北始平總知河北之亂權在此輩於是盡籍軍中宿將名豪如朱克融之流薦之於朝冀厚與爵位使北方

之人羨慕向進草其亂心而宰相崔植杜元穎皆庸人
無遠慮以為河北既平天下無事克融輩久留京師終
不錄用飢寒無告怨忿思亂會張弘靖赴鎮遂遣還幽
州而克融等作亂復失河朔今陛下鑒唐室既往之咎
當收京東河北豪傑之心臣伏見近日沂州百姓程棐
告獲妖賊郭進等竊聞棐之弟岳乃是李逢之黨配在
桂州豪俠武健又過於棐京東州郡如棐岳者不可勝
數此等弃而不用即作賊收而用之即捉賊其理甚明

臣願陛下精選青鄆兩帥京東西職司及徐充單漣
密淄齊曹濮知州諭以此意使陰求部內豪猾之士或
有武力或多權謀或通術數而曉兵或家富於財而
好施如此之類皆召而勸獎使以告捕自効籍其姓名
以聞於朝所獲盜賊量輕重酬賞若獲真盜大姦隨即
錄用若只是尋常劫賊即累其人數酬以一官使此輩
歆艷其利以為進身之資但能拔擢數人則一路自然
競勸貢舉之外別設此科則向之遺材皆為我用縱有

姦雄嘯聚亦自無徒但每州搜羅得一二十人即耳目徧地盜賊無容足之處矣歷觀自古竒偉之士如周處戴淵之流皆出於羣盜改惡修善不害為賢而況以捉賊出身有何不可若朝廷隨才試用異日捍邊隅立功名未必不由此塗出也非陛下神聖英武不能決行此策臣雖非職事而受恩至深有所見聞不敢瘖默謹錄奏聞伏候勅旨

彭汝礪奏曰臣竊聞京東河北東西羣盜不禁朝廷數

月經置知所以係聖念深矣臣伏惟河北土地堅固風俗尚氣好勝寧死於盜賊以死於飢餓為恥其喜亂蓋天性也陛下仁儉朝廷清明非有可窺之間隙而豪宄不道烏合蟻附白晝殺人於市以食攻劫縣鎮掠奪妻孥此亦聖慮之所宜加察消消不已將不可隄防矣臣備數言責不勝日夜之憂謹具畫一事件少冀裨補

臣伏思盜賊之勢可以智勝不可以力制也以國家粟米之多兵革之堅利而不能以一日殄絕狗偷鼠

竊之盜亦不能無之也比雖聞巡檢縣尉許不依常
例舉差巡檢縣尉已指蹤制勝蓋猶不與焉臣讀史
觀漢京兆盜賊驚擾王尊不出關而治渤海多劫掠
龔遂下車而化然則使逐處有人則不能縱之至此
矣臣欲乞早賜選差仁明智略之吏出領諸郡稍寬
繩法使隨宜處之幾早殄絕以銷未形之患

臣竊聞河朔比數不登民至賣妻鬻子以食遷徙者
相踵死者相枕籍有司不知還定安集而頭會箕歛

然則民至相聚為盜者非獨民之罪也吏亦有罪焉
自北而來累為臣言去年秋不雨冬亦少雪麥根多
不入土春夏之初民食恐不足朝廷不早加恤貧弱
者或以賊為依而黨與寢多矣臣欲乞專使體量稍
寬諸般色役以安貧弱夫使善民懷惠而無解散之
心姦人畏威而有不敢為之志賊之勢易見衰止矣
劉執上言曰天下雖有極治之政而不能使民不為盜
雖然能禁其為盜而已三代兩漢以來比追胥嚴捕察

其法張弛時雖有不同要皆謹於搜逐奸惡以安善良者也國家於盜賊其防禁固已明具而近時捕法一有可言者舊制盜發地分應職在伺察捕索之人皆給百日以為三限每限不獲抵罪有差蓋使身任其責心有所畏然後肯協心出力略張耳目求賊以自免故官司頗得其用今新勅雖不獲賊有罪然乃將兩限科校聽各罰錢曰以充捕賞其次仍許收贖而鄉村耆長壯丁近且廢罷代以保甲保甲之法保內被盜止出賞錢

更無認限決罰之法小人之情不以刑懼勢驅之使有
不得已者則何事肯僂力為公家索賦耶其所輸錢又
不過資取衆人夤緣自利正其所便

中書舍人曾鞏上言曰臣伏以周禮以五家為比使之
相保推之至於五州為鄉因其民以用之於田役追胥
之事管仲於齊亦以五家為軌推之至於五鄉為軍以
有三軍之制蓋生民之業資於衣食則為農資於備禦
則為兵其所恃之理然也後世言兵者以謂九夫為井

此八陣之法所由出也五家為軌此師旅之法所由出也
也以臣考之所以然者非三軍之政取法於鄉田蓋古
者生民之業兵農非異務也自經界既廢而兵農始殊
秦漢之際大率十里一亭亭有長十亭一鄉鄉有三老
有秩嗇夫游徼三老掌教化嗇夫職聽獄訟收賦稅游
徼循禁盜亦比閭族黨卒伍追胥之遺事也今保甲之
制自五家為保推之至於有大小保長有都副保正職
承文書督盜賊與比閭有長鄉亭有嗇夫游徼非異意

也臣昨守亳州亳為多盜重法之地臣推保甲之法以禁盜賊幸不至繆戾誠不自揆欲於保甲巡檢縣尉之法所以防慮盜賊者有所推廣以稱朝廷立法之意

一諸處自來盜賊並是外來浮浪行止不明之人或
是本處素來無賴之人保甲之法使五家為保蓋
欲察舉非違之事一保五家若有一家藏匿外來
浮浪行止不明之人或一家有素來無賴之人即
五家無由不知而法禁之中不責其顏情蓋此則

人於鄉里誰肯告言若為設禁防使不告官者因
事發露則有相坐之刑人情自愛誰肯苟容此乃
本立保伍察非違之意也所察舉者藏匿惡人之
家所以為人除患固非開告訐之路傷隣里之義
也若藏匿之家自不能揜則惡人何所容入盜賊
不禁而自熄理之所可必也欲乞外來浮浪行止
不明之人保內不得舍止本處素來無賴之人保
內須以姓名申官官為籍記係籍之人凡有出入

並須告知本保若保內舍止外來浮浪行止不明
之人犯人嚴斷同保不糾科不言上之罪保內本
處無賴之人同保不以姓名申官及係籍之人出
入不告本保本保不糾亦並科不言上之罪犯人
嚴斷所貴有所闕防可以暗銷盜賊況自來州縣
亦往往有禁絕舍止浮浪及籍記惡人之處可以
斷得盜賊別無擾煩兼保甲條諸保內有外來人
如行止顯有不明即收領送官則是法意蓋已及

此今來所乞只是申明更欲詳備伏乞裁酌施行
一伏見熙寧六年保甲條法保內如遇有盜賊晝時
告報大保長已下同保人戶即時前去救應追捕
如入別保即遞相擊鼓應接籠逐元豐二年詳定
上條節文諸保內賊盜晝時集本保追捕如入別
保遞相告報嚴逐臣竊以謂元條及詳定互有詳
畧若合而用之則彌綸之意無所不備今所乞指
揮諸保內賊盜晝時集本保追捕如入別保即遞

相擊鼓報應嚴逐並置鋪屋及鼓仍輪保丁巡宿
如此則保伍之內既不得容止惡人巡宿之法又
備如有賊發則合力追捕措置無所不盡於本置
保甲之意委曲備具亦古者井田守望相助後世
置鄉亭徼巡盜賊之遺法也

一伏見熙寧敕節文諸巡檢常於地分內巡警廨宇
所在州給與印歷逐季點檢臣欲乞相度指揮重
法地分巡檢縣尉常於地分內巡警每旬具所到

地分申州仍給與行程印歷每季本州將旬申與
印歷委官點磨違者取勘施行州不督察監司按
劾以聞如此則制置捕盜之官事體均一理在必
行不容苟簡之人得以廢法使捕盜之官分巡不
止保甲候望轉相承接盜賊所向輒遇譏察竊發
之謀必自衰熄或有伺間不逞之人亦易敗獲

右司諫蘇轍奏請罷右職縣尉劄子曰臣伏見舊法縣
尉皆用選人自近歲民貧多盜言事者不知救之於本

遂請重法縣尉地分並用武夫自改法以來未聞盜賊
為之衰少而武夫貪暴不畏條法侵漁弓手先失爪牙
之心搔擾鄉村復為人民之患臣竊惟捕盜之術要在
先得弓手之情次獲鄉村之助耳目既廣網羅先具稍
加方畧易以成功舊用選人雖未能一一如此而頗知
畏法則必愛人使之出入民間於勢為便不必親習騎
射躬自格鬪然後能獲賊也今改用武夫未必皆敢入
賊而不習法律先已擾民訪聞河北京東淮南等路凡

用武夫縣分民甚患之欲乞復令吏部依舊只差選人所貴吏民相安不至驚擾

知洋州文同上奏曰臣竊見本州守治之所正居漢水之上川陸平行廣袤千里東北諸山縈帶聯屬徑路盤屈隙穴深遠上通荆楚旁出岐雍其中所產濟人急用之助品目甚衆旦夕羸輦道路不絕閭巷井邑百貨填委實四方商賈貿易畢至之地衣被秦蜀有足仰者漢唐之際已名重郡然而至今有所不能稱是者城池庫

漫全不如事不知幾年滅裂為此苦茅累土宛若鼠戲
缺漏頽落殆不可睹奸庸取罪常在跳越倉庫所寄僅
同空曠臣自至此即謀增葺患無兵夫不能施手每一
慮至此沈吟終日伏以國家設州郡列官府具儲蓄養
士卒大抵本以為民故如此其備也夫何此州當襟喉
要害之處而顧無壁壘壕塹之防以保護之譬之於人
也筋骨雖云完固而皮草日已爛墮將何以為負恃而
能使其中安且久耶一體既虧身不宜矣伏望朝廷慰

念黎庶軫恤遐遠特降中旨許令脩築度其工力了不至大庶使郡國制度無有一物廢闕亦有備無患之深計也臣又竊見管內三縣疆境絕為曠濶高山深林蔓衍重複直與巴達金鳳永興鳳翔等處層蓋相密其遠者有至五六百里近者亦不下三四百里中間有如子午駱谷之類斜通直達徑路不少私商暗旅出入如織通奸隱罪萃為淵藪富谷之民孱懦畏事迫於衆勢遂爾囊橐所居幽僻人不敢問既因全無防守所以難為

檢過臣愚常此過慮忽爾蜂驚鼠駭妄肆螫齧散走巢窟肆出為暴呼集除盪形影不及亦須數日為之擾擾往日光化軍近年慶州叛賊悉趨此路謀行於蜀是時西南郡邑聞風震聳賴以朝廷威靈元元之幸而卒以就敗然而此州既為凶盜累伺其隙是後恬然不為之備至今耆叅宿吏語議及此則無不人人咨嗟嘆惋是知如此與他州別郡封壤按聚隘阨奔衝之處平時常宜預設保禦之方其或事有萬一臨時取具必然手足

錯亂不相揅應前無兵而後無城未免一方人心不得
不使之且夕恐懼而莫如之何也臣今欲乞朝廷特賜
詳酌更添置武寧一指揮或且先於諸處那屯三五百
人常令住此不許亡出以備緩急驅使如此則上可以
紓朝廷之憂下可以慰百姓之望臣職在守土理當建
述此二事者伏望睿慈不罪其狂瞽而留意焉

哲宗元祐元年門下侍郎司馬光乞罷保甲招置長名
弓手狀曰臣竊見府界及三路保甲雖罷團教猶冬教

一月於民有損於官無益不若盡罷之便何則比於團
教之時民間勞費雖十減六七然猶有三四此所謂於
民有損也朝廷每歲遣使按閱所費金帛以百萬計而
終無所用之此所謂於官無益也臣以為不若盡罷之
便自置保甲以來盜賊倍多所以然者鄉村無賴子弟
乍涉城市聞見紛華自恃身為保丁坐索本家供給飲
博遊蕩習以成性今雖罷團教不肯復歸南畝服田力
穡逸欲既深資用不足既家藏利兵又身挾武藝由是

邀結黨友羣行攻劫父兄不能禁州縣不能制此自然之勢也是以數年以來年不甚飢而府界二路盜賊縱橫入縣鎮殺官吏若遇蟲蝗水旱大飢之歲將若之何此不可不為之慮也以臣愚見莫若盡罷府界及諸路保甲據逐縣主戶數目盜賊多少委提點刑獄相度每若干戶置長名弓手一人與免戶下租稅支移折變及夫役諸般差徭科配一無所預務為優假使人歆慕每十人置節級一員五十人置十將一員百人置員寮一

員二百人以上置指揮使副指揮使各一員雖不及二百人亦置指揮使副指揮使名目盡管一縣弓手以為賞功資級其節級始初且令本縣令佐依上名下次或選有部轄者權管候有長行投殺到強盜一人即補充正節級替下權管之人自後每捉殺到強賊一人依此遷一級若未有闕且為守闕不得管人候有闕日補正其累功勞遷至正指揮使滿三年以上又曾捉殺到強盜三人從來不曾犯贓罪者仰本縣官吏結罪保明申

州本州官吏結罪保明申奏乞朝廷與於三班借差內
安排若遇有強惡賊人朝廷臨時別立賞格者不在此
限如此則保甲中勇健之士見前有出官之望來應募
者必多除第一第二等戶物力高强合充重役不得應
募外其餘但於本縣有戶籍田產不以等第高下並許
投充長名弓手永無解役之期若一人闕額有二人以
上爭投者即委令佐揀試武藝高强者充如此則本縣
勇健者皆充弓手其餘懦弱者雖使之為盜亦無能為

患若見充長名弓手人有勇力武藝衰退者許令外人
指名比較若勝於舊者即令充替如此則不須教閱武
藝自然長得精熟仍委本州及提點刑獄常切覺察令
佐有取捨不公者取勘依法施行若應募未滿見今鄉
差弓手之數即且令鄉差弓手相兼祇應候招到長名
弓手一人即替鄉差弓手一人歸農其鄉差弓手願投
長名者亦聽若長名弓手及百人以上即令分一半作
兩番二百人以上每百餘人分作一番並年終交替其

上番者隨縣尉逐捕盜賊自節級以上各令管所轄之人若所轄之人有小可過犯許一面區分不得過小杖十下若所轄之人敢陵犯本轄人員者杖一百毆者徒一年雖權管亦同本轄人員若於所轄人處取受財物並依律科罪犯贓罪杖者若係管轄權管即降充長行下名若係正人員即降一資自後每捉殺到強盜兩人始當一人罪至徒者不以權正並降充長行下名自後每捉殺到強盜三人始當一人雖許遷資並係額外不

得管人不得出官若遇下番則不相管轄亦無階級其
下番者自十將以下各隨所居之處與耆長同覺察本
管地分內曾有為強盜之人及窩藏之家凡為強盜者
不等於本管分作過須在他處蓋恐累及本地分捕盜
人無所自容故也其本地分捕盜人往往知之莫肯發
舉盜既得財分贓則絕迹遠遁其賊發地分捕盜人雖
欲擒捕莫知其處官中雖立三限科校終無所益由此
賊發地分捕盜人每有賊發莫肯申舉若變主懦弱則

多方抑塞不令聲賊變主強梁則共陪所失之財勸和使休是致羣盜無所忌憚日益昌盛又告捕得賊多被賊人讎報焚燒莊舍屠害老小其賞錢豈宜留滯而往往為州縣沮難有司靳惜動有經年請領不得使之解體欲乞今後應賊發地方凡捕盜人更不立三限科校捕盜官亦不批罰只以擒賊多少論其功賞若敢抑塞隱蔽從嚴法施行仍每州各隨大小賊盜多少借官錢數千貫專充告捕賞錢每獲強盜勘得從來住止窩藏

去處候斷遣已了委本州長吏當日先以官錢支給告捕之人即移牒出賊州縣勾追住止窩藏地分捕盜人科不覺察罪弓手杖一百耆長杖八十壯丁笞四十先籍沒賊人及窩藏家財產償所支賞錢外其不足之數令捕盜人等均攤限一月催足津般赴給賞州軍補填官錢若路遠難以津般則各於本州官錢內闕牒折充其強惡賊人朝廷特於常法外多立賞錢者自以省錢充不在捕盜人均攤之限如此則盜賊無所容身必思

改過自新若果行此法府界三路既免教閱勞費之患
無賴子弟又有所歸投得以羈縻諸路正鄉村之名復
國家舊制勇健之士前有仕進之望爭討賊立功不待
教閱而弓手武藝自然不敢衰退不須點差而鄉兵自
足兼有所用人雖衆多而上下有綱紀不敢相侵暴賊
發地分捕盜人不知賊處免虛受刑責出賊地分為累
及身不敢蔽匿景跡之人被盜之家無人抑塞有所伸
訴賊盜窮窘無所容身稍冀衰息

六年禮部侍郎范祖禹奏曰臣聞昔季康子患盜問於孔子孔子對曰苟子之不欲雖賞之不竊季康子又問政於孔子曰如殺無道以就有道何如孔子對曰子為政焉用殺子欲善而民善矣君子之德風小人之德草草上之風必偃臣始讀書蓋嘗疑之以為聖人之言王於教化而已行之未必有近效也及觀唐太宗初即位與羣臣論止盜或請重法以禁之太宗哂之曰民之所以為盜者由賦繁役重官吏貪求飢寒切身故不暇顧

廉耻耳朕當去奢省費輕徭薄賦選用廉吏使民衣食有餘則自不為盜安用重法耶自是數年之後海內升平路不拾遺外戶不閉商旅野宿焉臣觀太宗之政如此乃始知聖人之言不欺後世行之必有近效也夫以區區之魯國季康子為相孔子猶勸之不欲所以止盜而況天子之於天下乎季康子魯之執政猶不可以言殺當欲善而已而況天子之於天下乎自古用重法以止盜者莫如五代之漢漢高祖即位之年患四方盜賊

衆多敕盜賊無問贓多少皆抵死仍分命使者逐捕寧
相蘇逢吉草詔意云應賊盜其本家并四隣同保皆全
族處斬衆以為盜猶不可族况隣保乎逢吉固爭不得
已但省去全族二字由是鄆州捕賊使者張令柔殺平
陰縣十七村民其法可謂重矣然盜賊不為衰止漢室
不四年而亡夫唐太宗之政如彼漢高祖之法如此有
天下者當以盛唐為法乎當以季漢為法乎至周太祖
時竊盜賊滿三匹者猶棄市太祖皇帝代虐以寬稍輕

盜法累聖仁厚哀矜庶獄遞加減貸故竊盜遂無死刑
然今編敕所定盜賊猶重於律三倍蓋承五代刑罰世
重減之極輕猶至於此豈可更增重乎臣伏見熙寧四
年中書檢正官奏請開封府東明考城長垣等縣京西
滑州淮南宿州河北澶州京東應天府濮齊徐濟單兗
鄆沂等州淮陽軍別立盜賊重法其後又有他州奏請
乞比東明等處行重法者有重法之地又有犯法之民
夫溥天之下莫非王土食土之毛誰非君民今獨視此

州縣如遠方異域之人別立盜法自行法以來二十餘年不聞盜賊衰止但聞其愈多耳老子曰法令滋彰盜賊多有又曰民常不畏死柰何以死懼之夫上以善待民乃可望民為善以應上若其不應罪在民也上以惡待民則民為惡以應上乃其理也何足怪其多乎古者開衣食之源立教化之官先之以節儉示之以敦樸倉廩實而知禮節衣食足而知榮辱則自不為盜有邪僻之民然後從之以刑豈有不治其本而專禁其末不清

其源而欲塞其流也若以重法為權時之宜行之數年而盜少於前固當除之復用中典若盜益多於前則是重法不足止盜甚明其可除去無疑也又重法之地皆舉知縣必擇彊健之吏被此選者奉法除盜視民如讎一切以擊斷為稱職此豈平世所宜為乎臣愚欲乞悉除重法改重法地分為舉知縣地分夫天下縣令皆不可不擇獨此諸縣先已舉吏則不可廢民多奸猾尤須良吏以治之選吏以養民不命吏以敵民也及今四方

人情少安改峻法為平法庶可以變惡俗為善俗止用
常典足以禁奸其刑亦不輕矣若行重法不已盜賊益
多臣將見此數十州之民無樂生之心一有凶年飢饉
則為等死之計羣起而為大盜雖有重法又可禁乎惟
陛下無以孔子之言為迂無以唐太宗之治為難無以
教化為不急無以峻法為足恃則民皆可使為善矣
招宗時右司諫蘇轍乞招保甲充軍以消盜賊狀曰臣
聞薄賦歛散蓄聚若以致貧而民安其生盜賊不作縣

官食租衣稅廩有餘粟帑有餘布久而不勝其富也厚
賦斂奪民利若致富而所入有限所害無窮大者亡
國小者致寇寇盜一起盡所得之利不償所費之十一
久而不勝其貧也臣未敢遠引陳勝吳廣龐勛黃巢之
類只如淳化中李順慶歷中張海等熙寧中廩息此數
火盜賊計其燔燒官寺劫略倉庫以至發兵命將轉輸
糧食耗失兵械募士賞功之費大率不下數百萬貫但
得事了豈敢言費然方其未發有能建言亡捐數十萬

貫以消其變則上下爭執如惜支體不肯割截此天下之大迷古今之通患也故臣願於元豐庫或內藏庫乞錢三十萬貫上以為先帝收恩於既往下以為社稷消患於未萌伏願陛下權禍福之重輕較得喪之多少斷而行之毋使有司吝於出納以害大計河北之民喜為剽劫所從來尚矣近歲創為保甲驅之使離南畝教之使習凶器一夫在官一家資送窮苦無聊靡所不至椎埋為奸十人而九號為保甲莫敢誰何若更一年不罷

則勝廣之事可立而待也今雖已罷而弓刀之手不可
以復執鋤酒肉之口不可以復茹蔬既無所歸勢必為
盜今河北寇賊成羣訪聞皆是保甲餘黨若因之以饑
饉則變故之作不可復知近歲富弼知青州是時河北
流民百萬轉徙京東弼既設方略振活其老幼而招其
壯悍者為軍不待朝旨皆刺指揮二字其後皆為勁兵
百萬之衆無一人為盜者弼人臣便宜行事猶能若此
況陛下富有四海而元豐及內庫錢物山積莫可計數

只如近日內降睿思殿金銀一色令別庫收貯者自約
及百餘萬貫皆是先帝多方收拾以備緩急支用不取
於民聖筭深遠非凡所及若積而不用則與東漢西園
錢唐之瓊林大盈二庫何異於先帝聖德不為無損故
臣願乞三十萬貫為招軍例物選文武臣僚有才幹者
一二人分往河北逐路於保甲中招其彊勇精悍者為
禁軍隨其人才以定軍分本州無關則自近及遠或押
上京不過一二萬人則河北豪傑略盡矣其間武藝絕

倫舊日以補班行者押赴闕試驗有實即以補內六班之闕或以補本貫及鄰近闕額軍員但當嚴賜指揮候了日當遣人覆按有不如法重坐官吏臣聞先帝本謂保甲可用故欲隱兵於農以漸消正兵是以禁軍多有闕額今保甲既罷正使無事猶合補填況如前所陳者惟陛下深察果斷而力行之今冬春大旱二麥不熟事勢如此恐不可緩

侍御史劉摯論盜賊疏曰臣竊以天下雖有極治之政

而不能使民不為盜也。然要能禁其為盜而已。歷世以來法嚴則盜衰，法寬則盜盛。國朝自近歲差役用募法而官弛捕盜之禁，保甲行教法而民滋為盜之心。前來滑州之單安、商州之王沖，以村野之人逃亡之卒，一有呼嘯遂能橫行蹂踐鄉縣，殺害官吏，以至煩遣兵將重為騷擾，大勞大費，僅能散撲，皆由防禁寬縱，賞罰不明而寒飢猖狂之人附之者衆故也。近日制旨既薄，斂輕賦稍還，其衣食之路又復置弓手及縣尉巡檢而察捕。

賞罰並從舊典所以防備奸惡安養善良之意可謂甚厚然訪聞州縣不甚究心召募弓手至今殊未就緒巡檢兵級多未差填見今河北陝西京東西所在常有盜賊攘劫鈔竊殆無虛日鄉野間井人頗不安蓋前來保甲巡檢指使既有更不管勾指揮則其意固已不在於捕盜而新復官吏又未就職此盜之所以乘間而作累歲已來民間豐稔今尚如此自去冬大旱二麥失望積穀之家觀望不發人已艱食臣慮將來寇盜更有甚於

今日欲乞指揮逐路監司為備盜之計督促州縣速招弓手及差撥巡檢兵級嚴責近限早令數足以時訓齊准備緩急及再乞指揮吏部所差注巡檢縣尉略加選擇催遣赴任

畢仲游上言曰臣伏見開封府盜賊條禁至多而禦盜之方其大節有未備者以外路州軍言之捕盜之官在城內則都監監押城外則巡檢縣尉蓋不可易之官也今京城外巡檢縣尉與外州軍略同而京城內巡檢之

職寓於馬軍步軍帥臣與四廂王者雖主徼巡於國中而尋常盜賊舊不干預自來開封府承例令使臣人員等密行緝捕獲賊有賞而不獲無甚譴罰人微責輕往往反與盜賊為市而諸廂小使臣雖帶督察盜賊其實分管估計家業取問病人口詞并檢驗掠火等雜務不類捕盜之官理如未盡臣愚欲乞於馬步軍帥及四廂主巡檢之下別增置廂巡檢六員其二在舊城內其四在新城內四壁使諸司使副或大使臣為之隸於開封

府得以職事舉薦按劾仍倣外州軍都監監押功過殿
最之法而增損之使專治巡檢職事亦不廢開封緝捕
公人則京師盜賊知有專一責任之官自然人戶安居
奸盜屏息輦轂之治不為無助

仲游又奏曰捕盜之法遇有賊必立重賞購人緝捕立
賞既重則宜人人鬪用智力以應賞格然則州縣每有
盜賊更一二十火未見有賊因賞而敗者此非重賞不
足以捕盜盖州縣給賞須拘條格每有人捕賊到官留

連勘鞠近者一兩月遠者須半年一歲等候獄成然後
檢坐條格支給賞物其該賞之人捕賊到官經隔歲月
未有所得或者過狀陳訴遷延詰難方始得賞又其甚
者則勾追往返取問捕賊因依拘繫一兩月費用錢物
方始得賞其人居家各有生計因官司勾追理會賞格
往往暫廢經紀設使賞格不行反成失所故皆謂官司
立賞雖重及至獲賊未必如數皆得縱得所賞亦留滯
別有妨廢以此人人無意捉賊雖見榜揭視為空文今

欲乞令州縣各預儲賞錢在逐處收掌遇有盜賊曉示
數目召人緝捕如獲到官見得委是賊人別無虛偽未
勘得賊人情狀先取問捉獲因依不候結解令州縣先
次保明給賞與捕緝之人不得淹延追擾如此即小人
雖不知義理但見捕賊入官別無留滯便得重賞更相
傳告宜有勸慕人人鬪用智力捕賊以應賞格故立賞
在信行賞在速立賞不信行賞不速不足以使衆非唯
今日之當為蓋亦古人之常事也

劉放上奏曰臣昨因轉對獻議欲以盜賊罪至極刑而
遇恩赦及以按問自首減死者加以刑刑事下有司不
蒙施行臣竊聽衆論以謂肉刑慘烈驚駭人聽故不可
用臣以謂不然臣所議則刑非施之常民以禁盜賊爾
又非施於常盜以馭當死而遇減者如此亦何慘刻之
有凡民能為盜賊必其強壯凶悍有過人之資其犯至
死罪者又必其桀黠無道者也雖遇恩有寬貸豈具有
自新反善之意幸創痛完復則重為惡譬蠹蟲之被傷

而復完者其毒人必深臣故願加之刑纔廢其一足
完全其生不去鄉里然雖有暴虐害物之心而材武絕
衆不得復用於以懲奸絕惡其益不輕乞重下有司詳
定指揮

高宗建炎三年張浚上言曰臣竊謂當今盜賊竊發理
宜誅伐使無遺類然事有出於權宜而不可輕舉者臣
聞盜賊之徒多河北京東失業之人義不歸敵偷生中
國若欲盡殺之是必使之盡歸敵人而後已又御前之

師儻百戰百勝固無足道萬一稍挫銳於盜賊則王師之勢愈弱何以捍禦敵人臣謂不如臨之以聲勢如差某軍行且令駐軍未發先遣辯士往諭之來則徙其老弱於江南分屯少壯於淮甸以待防秋他日國勢苟立何施而不可者惟陛下留意

建炎中御史中丞許景衡奏乞措置杭州軍賊疏曰臣契勘杭州軍賊比已招降今訪聞逐人雖已拜命尚閉城門未嘗解甲仍稱薛昂已有申請須候朝廷回降指

揮方肯開門即未知薛昂如何奏請朝廷曾未報應也竊原仁聖之意不欲進兵討賊正恐濫及無辜所以招降仍加爵命者蓋謂一城生齒也而羣賊反側未安却以待報為名故作遷延今閉門已五十餘日一城生齒飢餓狼狽日俟朝廷之報若不速賜撫循不唯失招降之初指竊恐淹久別致生事杭為東南重地而風土輕脫易於從亂不可不慮也臣愚欲望睿明檢會薛昂所奏若只是亡放羣賊之罪招降之後有司不得殺戮則

乞詳酌依其所請再降敕榜專差使臣星夜前去開諭
羣賊速令開門以救一城垂死之命寔天慈終始之賜
也

景衡論捉殺鎮江賊劄子曰臣聞鎮江府羣賊聞官軍
且至頗有逃遁之計其一路係本府下熟驛前此已曾
鈔虜今來官軍若繇真州渡江以往則此路無虞矣其
一路東走常州昨者已曾許以金帛犒設其無備為可
知若更前進則不獨浙西諸州為可慮深恐杭賊合謀

如臣前日所策也契勘揚州管下柴虛鎮亦名口岸渡江後四十里至常州竄為捷徑如蒙裁酌別遣人馬繇此路以往遏其奔衝則賊勢亦窘矣如前日官軍方事奮擊則今所遣者亦可夾攻庶幾朝夕殄滅今車駕駐蹕于此而賊在北境非所以振國威也伏乞速降指揮即行措置使兇徒就擒江渡通快誠今日之急務也

景衡又奏乞招投軍賊疏曰臣契勘杭州軍賊以蒙詔書招降已拜恩命而不解甲復閉城門間緣陰霧輒出

城戰破官軍虜執提點刑獄官訪聞秀州守城復入招
降即未見得後來如何奏報逆黨反復如此神人所不
容今來若已招安開城門在朝廷不欲失信當一切赦
其罪惡不然所宜痛治以戒將來也提點刑獄官屯守
城外乃為賊虜劫則其方略可知矣豈可復倚仗耶今
杭州閉門已七十五日殺傷之外飢餓而死者已不勝
其多生靈無辜誠可憐憫如秀州守臣不曾奏到招降
次第伏望聖慈明詔三省樞密院即行措置如合捉殺

亦乞精選將卒疾速前去杭為東南都會其俗輕脫易於從亂今城門久閉援兵不至若被誘脇則皆從賊其勢益張為害大矣豈獨殺傷餓餒為可憐哉如拯溺救焚不可時刻濡滯也臣以言責既有所聞不免喋喋渎聖聽蓋事有不得已者伏乞裁擇速降指揮

景衡又論捉殺杭州鎮江軍賊劄子曰臣昨論奏杭州鎮江府軍賊事乞朝廷措置施行臣曉夕思之若二賊止於閉城自守官軍疾速掩殺可無他虞蓋杭為二浙

之腹心而鎮江為咽喉今二賊同惡皆據要地若不速行措置則閱日滋久奸計愈多萬一交通消息一日合謀而起則浙西諸州皆為賊所據矣此在朝廷不可不深慮而早為之區處也兼訪聞辛道宗下軍賊自到平江府吳江即肆焚劫比至本府城下守臣初欲犒設既而徇郡人之請必欲擊賊初戰雖敗繼能乘城矢石交擊晝夜不息賊遂遁去使他郡皆如平江則無可慮者聞所過常秀州皆厚斂金帛以為犒設而已設有緩急

果何賴哉今錢伯言已除鎮江守及遣將兵前去外唯杭州閉關幾八十日一城生齒若不從賊必皆垂死之命也而招降捉殺二說至今未決欲望朝廷擇其一而處之毋使合謀而起為意外之變也其平江府官吏能堅壁拒賊伏乞聖慈行下核實褒賞不獨養其後來銳氣亦所以為列郡之勸也

景衡又奏乞不招安建州軍賊劄子曰臣訪聞建州兵變殺傷漕臣及二三命官見閉城門抄虜居民本州奏

請招降自非出於迫脇當是循覈近例蓋招降之說乃是出於便宜非止寇之良策也前日杭州之事勢非獲已今若踵而行之則是縉紳橫被殺傷而逆賊反受爵命賞罰顛倒莫甚於此蓋自去歲福州兵變朝廷不魯窮治遂致江寧杭州相繼而作今日建州設更招安則習以成俗此禍未易息也況福建鎗仗手自是勁兵可以殄滅顧朝廷用之何如耳臣愚欲乞聖慈詳酌不須別遣兵將只乞指揮本路鈐轄提刑司令糾集將兵及

隣州鎗仗手許以厚賞疾速措置捉殺除首惡同謀之外其餘脇從更不究治仍不管逗留闕誤庶幾草招降之弊他州不敢視傲

景衡又奏曰臣聞建州兵變事昨日急於奏稟思慮未審其言有所未盡須至再具敷奏以備采擇臣乞更不招降只令捉殺則召募鎗仗手預合犒設其勇於入賊有功者亦合量借官資以俟奏功正授獲級者第賞仍令先次告報脇從之人喻以朝廷寬貸之意以上並乞

令師臣監司公共措置仍許便宜施行契勘閉城今已一月比及指揮到彼則又須一月不唯玩寇長奸而一城生齒日遭虜劫設或遲久則盡為賊誘其勢益張未易制也伏望睿慈詳酌速降指揮令差來人星夜齎持前去以究仁聖軫恤遠民之意

樞密院編脩官胡銓奏曰臣伏見江西州軍自金人侵犯之後未嘗一年間無寇而虔州數縣號為賊淵每一出寇則大焚殺至傷三四千人毆掠子女牛馬不可數

計州縣官吏往往多遭其害連年跳梁無所忌憚遂至散剽廣南諸州殺令破縣甚至攻城官司熟視無可柰何幸其去則遣烏合之卒名為追捕因緣剽虜又作一賊監司郡守諱言部中有寇不敢備申朝廷至其大段猖獗方始陳奏已無及矣況今清蹕進駐建康江東西實陛下關中而江西安撫司兵不滿千守備踈濶有如虔寇乘吾防秋又復竊發陛下未得置之度外臣愚欲望朝廷宜及防秋以前增遣一將付之帥司令於虔吉

兩界之間措置招捉仍令萃一路之兵以為聲援須務
戢盜不得因而騷擾庶使遠方細民安土樂業獲見中
興之治不勝幸甚

高宗時殿中侍御史張守上奏曰臣聞叛而伐之服而
舍之德刑並舉帝王之略也伏見陛下臨御以來建康
丹陽錢塘之寇次第勦除國威遠暢固足以慰一方之
憤快將士之心然皆始於招諭則皆貫其愆尤授之祿
秩使改過以自効且示陛下寬仁之大德也然德音未

絕于耳而兵屬其頸矣計其罪戾固蘊醢不足以塞責
但卷甲退聽之時正如掌上嬰兒殺之不武雖或其初
無朝廷招安之文其後有長惡不悛之迹然豈能遽使
天下戶曉哉方今四方寇盜尚多聞有欲降而反側猶
豫者往往以江寧杭潤之戮為詞也況陛下赤子弄兵
潢池豈皆本心第困於誅求迫於寒餓脇於兇逆不得
已者固不少矣既已招安當示以大信待以不疑聽其
自新遲之歲月俟其復出為惡則與衆棄之其誰曰不

然側聞江寇亦已就降臣以謂國勢未強兵力單敵不免用招安之策以平羣盜倘循前轍為害不細欲望聖慈詔諭三省密院以及將士應賊已就招安不得輒殺仰稱聖明所以伐叛捨服招攜懷遠之意

守知建康府乞措置丁家洲劄子曰臣自到任詢訪本路公私利害大小緩急隨宜施行其大且急者惟江賊出沒作過為往來商賈士庶之患見今府院禁勘賊火多是江中殺人劫盜蓋緣江流去岸稍遠雖有捕盜官

司難於巡察內有丁家洲在池州下太平州繁昌縣長八十餘里洲分為二江流出其中及兩旁洲上並無居民去兩岍人家亦遠為從來盜賊盤結之地他處口岸被賊舟船多是昏夜見無宗伴獨宿乘不備以取之如丁家洲往往白晝劫掠每得一舟必盡殺其人取其財沈舟水中官司無從根究於是商賈行上水則自蕪湖結甲而上行下水則自江州湖口結甲而下少者亦須十數舟而後敢行經過此處而或一二舟稍後即遭

劫掠前舟回視駭愕而不敢赴救又以被害舟船不見蹤緒則同伴雖欲投訴官司無以驗實或反為已累往往不復陳告州縣無由知之深恐日久為害不細朝廷向來雖於洲上置巡檢聞亦相去濶遠又土兵全關亦無舟船巡檢既不能誰何賊亦無所忌憚則是置巡檢司有名無實竊見沿江諸處見有屯駐水軍若令都統制就近輪差將官統一二百人及船十餘隻於丁家洲駐劄一月一替既奪其巢穴則無從盤結又知大軍屯

戍則不逞之輩自然銷弭伏望睿慈詳酌施行

章誼上奏曰臣竊見邵青張琪兩項賊兵捕竄日久猶未伏誅頗聞朝廷已有指揮更不招安此誠有誅無赦之義然三農穡事垂成邊邑防秋密邇賊徒所向不患無食而我之將士追捕撲滅不得暫息可無權宜制勝之策哉臣觀朝廷累年以來其於盜賊止是誅其首惡赦其餘黨今來邵青張琪手下人兵亦是赤子何可盡殺雖其渠魁罪在不赦自餘脇從徒黨乞降指揮許之

自新庶幾反仄之人得復舊業而聖主好生之德所被
彌廣不勝幸甚

誼又奏曰臣聞建州南劍州兩處盜賊未息朝廷專倚
辛企宗一軍控制一路誠可殫壓然臣謂兩處盜賊其
起殊塗則今日措置亦宜異術蓋范汝為自招安之後
首破劉時舉之兵故余勝等作亂聲言欲為劉時舉報
怨三家結仇各慮報復是以兵不肯散此建州盜賊之
所自起也李捧辛企宗之兵壓賊而戍日月漸久糧餉

漸艱建劔既為盜區無可供餽故錢米百費取之漳汀
泉福邵武之間行船者汴流而上負擔者一趼不息齊
民騷動無以自全遂相團結以避征役此南劔州將樂
縣盜之所自起也所起不同而欲一切齊之以兵則禍
亂不息以臣所見如范汝為之衆非有重兵彈壓使離
其巢穴散其黨與則建州境內之人終不自安劉時舉
余勝之黨終不敢復業至於將樂之盜本因賦斂之煩
力役之困若朝廷速行措置使范汝為之衆可起辛企

宗之兵可還朝廷仍復遣官宣諭有所蠲除則其餘弄兵之人可使棄兵而就耕矣臣聞福建官私空匱上下艱食朝廷今有益兵而不疾決則財力愈困比者朝廷委福建漕臣發米十萬石轉至行在若盡數存留使贍大軍仍於盜發之地量行賑糶候至賊平徐議補發則人情欣然便就安帖寔聖主之大惠也如臣所言仰合國論伏望早降詔旨以安反側不勝幸甚

誼又奏曰臣伏見朝廷昨遣朝請郎謝嚮招安建州范

汝為之兵存留疆壯無業可歸者萬人以備使喚其慮遠矣文書奏報往返數月就招之兵欲行則未有所之已散之人還鄉則指為賊黨失此機會於是喜亂之徒如劉時舉者聚兵自衛以討捕汝為為名聲迹相聞遂相屠戮不以逆順為疆弱但以眾寡為勝負矣今聞劉時舉既敗之後領其餘黨南趨邵武范汝為戰勝之餘恃其兵疆武斷於鄉曲朝廷方遣辛企宗正兵三千交割謝嚮一萬之眾若其聽命固為善矣或敢旅拒將如


之何竊惟李捧所以不能制范汝為者以李捧兵寡於汝為也謝嚮所以能招范汝為者以汝為乃謝嚮之部曲也今令謝嚮之兵盡交與辛企宗然而企宗之兵何異於李捧切慮汝為懷謝嚮之小惠而未肯行輕企宗之兵寡而不聽命萬一出此福建兵革之禍未有平寧之日也兼聞劉時舉見在邵武軍光澤縣有衆萬人又南劍州順昌縣賊徒余勝等一項衆亦數千朝廷果欲消患於未形則莫若命謝嚮為企宗之副而與之偕行

別遣能臣招撫劉時舉余勝之兵使之歸業如此則范
汝為一軍近憚企宗正兵之威遠懼時舉余勝來歸之
衆無不聽命矣福建數郡盜賊連結如此且復半年安
撫提刑司曾無措置為陛下分東顧之憂者其人材不
足以副朝廷委任之意亦可見矣今不遣能臣早加綏
撫使數州之人廢農桑之業因之以饑饉臣恐盜賊不
息疆土日蹙非國家之福也伏望聖慈特賜施行不勝
幸甚

王元渤論弭盜之術曰臣竊謂弭盜之術有二小盜宜求所以安之勿思所以勝之大盜宜求所以勝之勿思所以安之何者小盜鼠竊千百為羣或因規利貨財或緣不忍小忿順而接之宜有悛革若官軍不知出此必欲窮誅勝之不足增威不勝反成窺侮是以龔遂之臨渤海安赤子以稱良虞詡之在朝歌殺降者而生恨臣故曰盜之小者宜求所以安之勿思所以勝之也若乃大盜株連踰州跨邑嘯聚不逞攻劫善良此敵國之所

視以卜我興衰寇賊之所憑以相為屑齒若不講明軍律選練羣鋒斷之以必取之謀示之以不赦之意使彼羣醜必底滅亡則將大盜不除小寇是儆州州相煽轉發禍梯安能風示遠方擴清宇內成中興之漸覲奠枕之安乎臣故曰盜之大者必思所以勝之勿思所以安之也今者羣盜之中江州為最昔憲宗已平淮蔡河朔遂朝然方師未有功羣言屢至賴憲宗明斷以有蔡功臣恐江州之寇稍成遷延官軍淹時或有小衄則必有

言其外順之執謂可懷柔者臣願朝廷斷而行之勿卹
羣言必殄此賊以為四方之戒也



歷代名臣奏議卷三百十八